

Pu kuyfike ce ñi awkantun

Manuel Mañkelef

Gvlvmpelu: Demian Araya Lobos
Mvxvmwe: demianclaudio@gmail.com
Zewmamum tati wvnen: 14-01-22 06:26g

Licencia de distribución Creative Commons [Atribución-CompartirIgual 4.0 Internacional](https://creativecommons.org/licenses/by-sa/4.0/).

Pu kuyfike ce xemvn

Ñi jeqvn mew pu ce kimfi ta wvxn, aren, ko, ka ñi wifvntulen, feymew je cum ta kimlayafuy ñi wifvntulen ñi kupvlwe mew, tañi kvme xarilen mew? Ñi gvmayael tukulelgekey moyo gvñvn mew, tañi kvmeliftugeael vxvftukugekey ko mew, ayvwkey tañi ñuke ñamlu ta ko mew, entugekey ta wvño ñamkey ko mew, feymew xanaelgekey kacu mew tañi pañintuael antv mew. Xemlu elmegekey kujin mew, ufisa mew tañi kamañgeael, feymew kim awkantukey, mari, epu mari cey ci kompañ egu awkantukey, notulkefi tañi kimgael cuci ñi zoy kawcugen. Zoy fvcalu werkvgekey ka tañi yewmeael cew ñi werkvgen mew katalgekey tañi puke namun pizwiñ mew. Mojfvñ fanelkefi ta ce, pigekey. Ñi takun ixo fey mvten, kiñe camaj, kiñe makuñ, ka kiñe xarilonko, Ragin xinxagkiyaw cumgeci wvxele ka aregepe rume, kizu ikey tañi rabi mew, umawtukey wekun, vtantukey kiñe xvlke ka takunuwkey makuñ mew, xinxankvlen xanawkey. Kako egu anci pigey tañi ayvn iael, kawaja mew ta xipalu, napor korv, ka maju poñv pigeygvn ayvn korv. Tvfaci iael mvna ye imekefi, piam, pu ce ñiwa kawcu ta egvn, piam. Pvcikece ñi xemvn mew may xipakey kizu ñi pin ka kom ce inaentukelu, cem kam ta wvxn, antv, gvñvn ixo cemgepe rume? Kuyfi kimvn, piam, mapuce ñi jewfiel ta mvñetun epe wvh mew, tvfa wvla pu ce San Kuan pigeci puh mew mvten ta mvñetukey, zoy mvñetule feyci puh mew zoy lif xipakey ñi kalvl ce tvfeyci pekaw mew.

Kuyfike awkantun

Rukatu awkantun

Ajimjim

Tañi awkantual tvfaci awkantun zuamgekey ta kayu kura ka makuñ. Elgekey ta lama, pu awkantufe anvkey, leliwkvlekey ka nvniekey ñi kayu kura wele kuwv mew. Jituael ta awkantun pegelkey ta kura wele kuwv mew ka wenuntukey man kuwv tañi kimgael ñi nienon cew rume. Cuci rume jitulkey, wenuntulkey ka paylakvnukey ta kuwv kuralen tañi kvme nieyael, wenuntukefi ka nvnetufi wenu kuwv mew, epu nvy re kimgael mvten. Kiñe mvten wenunpvrafi cumgeci ñi femvn jital mew, petu ñi akunon ta kura kiñe nvgekey mapu mew mvlelu tañi egumafiel xawvlen mew. Ka kiñe ñi nieael wvño vxvfpvramgekey ka kura ka pur mapu mew mvlelu nvgekey ka xawvlen majkotugekey. Petu ñi xawvyenieel ta kura wele kuwv mew xapvmgekey. Wewkey cuci zoy majkotulu ta kura, kom majkotulu nielay kon ta awkantun mew, meli rupa wewlu ta ce wewkey, koretukeygvn, ixo meli rupa entulu ñi koretugenon mew wewkey. Kvme majkotulu ta ce man kuwv mew wele mew nakvmkey.

Komikan

Tañi awkantuael wirigekey ta mapu, mari epu kura, epu norvmelgekey tañi kewayael kiñe zoy fvxañma egu. Pu mari epu kura xewa pigey ka kvzawkey tañi tuayael ta fvxa kura Komikelu pigelu. Pu xewa yafvlwkey tañi bagvmafiel ta Komikelu, tvfa kay bagvmkefi ta xewa kizu pekefiel mew mvten. Komikelu ci kura wewkey kom apvmfilu ta xewa, tutelu awkantufe ilgelkelay kiñe xewa no rume, tvfaci awkantun pu winka leonsijo pikefi.

Awar kuzen

Awar kuzeal ta ce pura awar pegelluwi kom ta fvlag gey, kiñe pvle entulgekey tapvb ka kurvlgey kurv rvgi egu, ka kurv az elgekey kiñe ponzon mew je may. Feymew may elgekey kiñe makuñ, ponxo cemgepe rume. Feymew may mari pvcike mamvj pegelkey tañi cazan ñi tunte wewgen, feycike mamvj *kof* pikefi ta ce. Wecun ponxo mew anvkey pu awkantufe ka pvr vxvfael ta kof vlkantukey ixo cem zvgu ñi akun lonko mew. Pu awar neyvlgekey kiñe zuke wenu pvralen ka tañi neygeael mew renxolkefi ta kuwv mew tañi naqvn mew je may. Kom kurv naqlu ka fvlag gepe rume, epu kof wewkey, ka meli mvten kurvlupawi. Pura naqnolu ka meli kurvnolu awar kuzewe kagelu mew rupay. Kiñe ñamlu kagelu konkey, wewkey ta kiñe meli rupa rupalu ta mari kof. Kvme awkantufe nakvmlu xapvmkefi ta kom kof ka cuci wvne xapvmlu ta wewkey may, xapvmvn pigey. Awar kuzen mew ñiwagey ta mapuce negvmal tañi pu cagvl kuwv, feymew je ta kom pu awar fvxa kurv mew mvten nakvmkelu, kayñe yem pvr atawkey. Pu awkantufe fvxa wirarkey, fvxa ka map ajkvtufali, tvfaco awkantun zoy ayvkey ta ce kom awkantun mew. Tvfaci awkantun ta awar kuzen.

Kecukawe

Awkantuael wirigey ta mapu, tuaykvnugey ka ragin mew anvkvnugey kiñe pvc i rvgi, wecun rvgi mew mvley ta señan ñi rupanoael ta kecukan neygeael. Tañi awkantuael mvr awkantufe mari kof nvkey ka cuci wvne xapvmfilu wewkey. Wewael ta kof neykvnukey ta kof, tunte ñi piel ta kecukan fenten entukey, feymew kagelu vxvfi, entuy ta kecu, feymew may jaq mari nieygvn, vxvflu kagelu kayñe ñi kof yemekey, femgeci wvne epu mari xapvmlu wewley. Vxvfael ta kecukan wirari ce ñi piae: kecu, kecu, parogepe rume. Kiñe mvten entulu ta ce paro pigey je may. Kvme awkantuael ta ce neykvnulafi ta kecukan miñce rvgi mew, kvmejelay wekun wirin naqlu ta kecukan. Tvfeyci awkantuyeel mew kecukan pigey, awkantun ta kecukawe, awkantufe ta kecukawfe.

Ejkawvn

Apon kvnageci mapu zujikey ta ce awkantuael, mari egu epu mari xawkey pu ce tañi kvme awkantuael. Kiñe xariwe, pvc i camal, pvc i makuñ ta ejkawkefi ta pvc i ke ce petu ñi anvlen kakelu ñi ajkvtuael, amumvn, pikey ejkawlu ta wesakelu. Ejkawlu ta wesakelu ta ñizol ka wirarkey: tvfa pvle, vye pvle, faci pvle, vye pvle, kom, tañi ayentuafiel cuci mupinlu tañi koybatuel mew, pu kintufe jazkvkeygvn tañi koybageel mew. Renxirenxitukey pu kintufe, vye pvle, wirari ta ce koybatuafiel mvten pu kintufe tañi pegenoam, mvlenoam je may wewfe. Kiñe ke afeluwkey, kakelu inaniefi mvten. Zewma kiñe puwlu cew ñi mvlemum tvfeyci ejkawkvlelu xalofxalofmekey ta kuwv xawal ta ce ka kimgaam ñi pvnonieel. Feymew may kom zujumigvn ka kiñe pvr wirari: kawcugen, wewvn, koybatulgekelay ta nienolu kon. Afkey ta awkantun kiñe vl mew ejkawvn pigelu, vlkantufi ta wewfe.

Mawmijan

Kiñe xokiñ kvla mari egu meli mari tuaykeygvn, nvwkeygvn ta kuwv mew, ragiñ mew epu zoy ñiwa tanpalgekey ta ge. Norvmkvleygvn, cuci mvxvmlu ta *maw* pikey, kagelu *mijan* wvñolkey. Maw pilu zujimkiyaw i norvmkefi lipag ka ixo ñoci je may amukey cew ñi mijan pigen. Kagelu lefkey ñoci pvnokey ka ayentukefi ñi piae *mivijan*. Zuñimlu ta ayekafi ta ce ka newentulgekey ta maw ñi pigeael: kvmey, femgeci amuge, nvfige. Nvnolu ta maw ayekey ta ce, fey mew ijkuy ta fvxake xekan mew ajkvtauel *mivijan*. Kiñeke rupa norvmkey ta kalvl kiñe xekan mew nvael, zvgekelay iney no rume, wirarkey kom tañi yafvluwam ta maw ñi nvafiel ta mijan fvxa lipag ta rofvlualu keciley. Zoy awkantufe entukey mvfuke maw egu mijan, afllu ta kiñeke vlkey ñi zvgun cuci ñi zoy kawcu ka ñiwagen mawael.

Ci pewkutun

Pewkutun ta awkantugekey mari kayu egu epu mari ce, inafvl ruka mew. Fvcake ce kvtu konkey famgeci awkantun tañi kvme kima el puke yaj ñi femgeci awkantun kuyfike ce. Tuaykeygvn ka ragin mew kvme elgey zoy pvcilu. Tunte ñi tuayvn fentekay wajpu rupakey ñi entual zoy pvcilu ragin mew mvlelu, renxirenxikeygvn ka kvme koyba mew konkeygvn ñi entuafiel zoy mvnal. Pu newen konkey ta ce maloal reke, kom pvle renximekeygvn, kiñeke afeluwkeygvn reke, xipakeygvn tañi wvñoael pu lef zoy xoglilu mew, kakelu kay kañpvle pu lef konigvn. Tuaykvlelu ñiwageygvn kay ixo yafvlniefigvn, femgeci may kom pvle pu le konke pu ñiwa awkantufe.

Kakelu kay ixo mekeniefigvn mvten tañi yegenael. Tvfeysi ce tuayniefilu tvfici ragiñtulelu newen ce je may, pu lipag em, tañi kvme yafvnieafel kayñe ñi newen je may, femgeci ta yegekelay ta kawcu. Tañi kvme kimgael cuci ñi zoy newengen xafkintukeygvn, cuci zuamlu entuael ta tuay mew mvlelu tuaykey wvla. Femgeci awkantun mew, awkan cegelu iñciñ tañi yom baku em, feymew ixo nakvmfigvn pewkutun ci awkantun ta newencegeael.

Ci xenxikawtun

Xenxikaw ta kiñe ka ragiñ nefku ta niey, ka ragiñ zuke rumegey, miñce wecun pvle elegekey epu pvcike lakal rvgi, namun ñi renxileam ka mvr kiñe namun feykvley. Tañi xekayawal pvrakey ta ce wenu pvcike lakal mamvj me ka fvxa cagvj namun nvwkey ta rvgi mew. Zewma pvrakelu ce xenxikawtun mew xekayawkey. Famgeci awkantun mew zoy zuamkey ta pvcike ce, hoal ta bewfv, pvci wvxvn ko mew ka capaz zuamgekey.

Ci pizkoytun

Tvfaci awkantun zoy ayvkefi pu mapunce, pizkoytun pige y tañi femgen pizkon lasuael je may. Tañi awkantuel xawvkey ta kvla mari egu meli mari. Kvme pizkokeygvn lipag mew tañi yenoael je may. Tañi jituael tvfaci awkantun ragiñ mew wixalekey, wirarlu ta ñizol lefklven tuaymey nor mew. Waycvfael mew wajmekey cuci wvnelu mew wixakvnumekey, tañi tuayael cuci inalelu mew, femgeci amukey tañi afael cew ñi tuwmum mew. Afmekey cew mvlemum welentu mew ci wvne tuaymvn mew. Pu lef epu jitulkey ta awkantun kiñe welentu mew kagelu man pvle xipakey. Tañi awkantuael epu xokiñ kayñewenkey. Kiñe xokiñ

mew jitulkey ta awkantun kagelu mew afkey, mvr xokiñ nvkefi wewgekelu, feymew zoy ñiwa mvten konkey. Zoy lefkelu ta mvten konkey afael ta awkantun, wewlu ta kiñe wewgekey kiñe kayñe xokiñ xipakey, femgeci may mari mvlelu kecu rupa yegele wewgekey, ayetugekey ka awkantu pigekey em. Wewlu ta metañyegekey ka ixo toro nielu kon pigekey, ixo pizkotufe vrke em. Famgeci awkantun mew fvxa wirarkey pu kawcuke koha, tañi hopuael renxirenimekeygvn pu ñiwa em.

Ci zujikan

Zujikan mew konkey fenxen pu wece, welu pura egu mari nakvmkeygvn, kvlwi egu wa zuamgekey. Kiñe lelfvn mew paxigekey ixo nor ta kvlwi. Kiñe mew elgekey ta kvlko tañi tukuael nimiel ci wa egu kvlwi. Pu awkantufe kizu ñi nor wirin kvlwi mew wixakey epu xekan kvlekey zoy pvjelelu mew. Kiñe mew may lefkeygvn nvmevgv ta kvlwi wvño elal kvlko mew, ka lefkvlen yemey ta kagelu ñi elpayafiel kvlko mew tañi wvñi yemeal ta ka kvlwi. Ixo kiñe mvten yemekey, cuci wvne apvmlu ta wewkey. Tukun ta yekelay ta awkantufe ñi ciripa mvten. Femgeci tukun mew arofkelay ta ce, femgefule ta kvrvf mew fiskeñafay. Cazgekelay ta pvlata.

Ci gvrvkuram

Kvla mari egu melu mati zujigekey ta kiñe gvrvkuram gealu, ejkawkey ixo cew rume, cemgepe rume. Kintukelu ta ixo ñoci miawkey tañi femgeci joftuael ta gvrv je may, re ñi kima el mvten. Cuci wvne joftulu ta wewkey. Gvrvkuram ta wirarkelay ka joftulu kay, kom pvle wvla afelgekey. Cuci afeluwlu ayegekey ka wajpagekey re wirarvn mew mvten. Feymew zoy jvkakey ta pofre koha yem. Kom pelu kom ta: iñce wvne pefiñ, pikeygvn ka lukatukeygvn may. Feymew may gvrvkuram ta feypikey cuci wvne pelu, fey wirarkey ayvwlu ta ce. Pvnnon mew kvtu ta inagekey ta gvrvkuram. Femgeci awkantun mew rupakey ta antv pu kawcu yem.

Ci coyketun

Ixo nor kiñe mew pu lef xipakeygvn epu egu kvla mati kiñe lelfvn pvle. Wvnelu mew amulu coykegekey, rvgkvkey wele pvle ka man pvle. Inalelu ina femgekey, kiñeke weza ina femgekey ka pu lef amukeygvn kom egvn ta coyke femkeygvn, ixo coyke ta koha yem. Rvgkvlu egvn wirarigvn tañi zoy yafvniefiel fvta coyketun. Afeluwkelaygvn tañi nvafiel ta coyke, ixo fentepun yewmefekey, ixoke mvcayke tuaytuaymekey fvta lelfvn mew. Coykegelu ta vrkvley xanawkey mapu mew, kakelu egvn kay tuaytuaykefigvn ka coyke ñi purvn purvkeygvn tañi kimgaal ñi wewvn ñi afelkenolen ta awkantun mew. Cuci coykegelu ixo tutey ñi lef, ka ixo fentepun kawcu rvgkvn mew ka ixo ñamkelay tañi inawvn. Kiñeke rupa kiñe muxu mew ñamvmkefi ta pu kayñe inalelu tañi nvgeael. Atawkelu xipakey. Zewma nvgelu kvme ka weza femlu feypigekey, ka kvme awkantufe pigekey tañi nvgenon mew, ixo toro pigekey may.

Newentu awkantun

Xvmvn

Tvfaci awkantun ta kuyfike ce ñi awkantun em tañi newen cegeael. Xvmvn winka ñi awkantun femgey football pigelu, welu pu awkantufe ta mari kiñe geygvn, mapuce ta meli. Pilma ta tapvl anken geygvn, tuaygekey ta koron mew tañi newentuael, pilma ta zewmagekey fvwmew xvlke egu. Tañi awkantuael epu xokiñ cazkey, meli awkantufe ta konkey, ta ñizol: jitumvn, pikey, feymew ta mapuce hamun mew yekey ta pilma, nvgekelay may. Pu hamun mew konkelu ta pilma rofvlkey ta awkantufe, feymew may zoy newengelu yekefi ka xananaqkefi pu kayñe, ka pu lef yekefi ta xvmvn afpun ci kuzen mew. Cuci wvne entulu meli rupa wewkey, femgeci awkantun mew koretukey tañi zoy kvme awkantuael. Feymew cuci yelu kvla kagelu entukey kiñe, kagelu yekey epu kagelu kay kiñe no rume, feymew may ta awkantun fente awkantukelu ta ce, awkantun mew ta xvmvn pigekey tañi muxurken ta ce ka ñi vxvfnaqvn ta mapuce.

Pilmatun

Pilmatun pigei awkantun re kuwv mew mvten nakvmgekey, pireñ pvle zoy awkantugekey. Tañi awkantuael tuaykey ta ce ka kiñe elgekey ta ragiñ mew tañi jituael ta awkantun. Ragiñ mew mvlelu miñce cag mew vxvftukefi tañi wvlelafi el ta wixalelu tuaykvlelu may, welu fey mew mvlelu lepukvnukey tañi wvlelgenoael ta pilma mew je may, ka kiñe rupa zincukvnukey tañi elxegenoa el ka ñi ixo pvr norvmael ñi kvme wixaleam je may, ñi awkantufegen mew. Pilma iney no rume wvlelnolu ka wvño vxvfgekey tañi tuwvn wvla afelgekey, tvfeyci tugelu ragiñ mew wixamekey tañi vxvfael. Femgeci may awkantugekey, afelkey ta ce afelxipalu wvla. Ragiñ mew mvlelu ñiwaluwi vxvftuel ta pilma ina pvle ka wvne pvle welu miñce mew kawcugey vxvftun mew, ayekey ta leliwkvlelu. Afelkey zvgulu twa ñizolkvlelu, feymew may purvkey ta awkantufe lonko purvn, tuaykefigvn inawlu ci ragiñ mew wixaxipalu, ragiñ ci ce vlkantukelu tañi puke ayvn vl tañi cazafiel zoy ñiwake awkantufe. Tañi kimgaal ñi cuci ta jital ta pilma gvnen zujigekey.

Lefvn

Lefvn mew fenxen ce awkantukelgvn, ka mvna ayvkefigvn, re mvr mvten amukegvn, zoy ayvkegvn epu konlu ka mvr fente leflu egvn ka mvr nienolu kon lefvn mew. Jitulu egvn may ixo amuy may epu kayñe yem, ixo yewmewigvn ta cag ka lipag, kiñe renxilu ta lipag negvmvn mew xananaqi ta fvxa kayñe yem! Wewlu may fvxa xekayawkey, wenunpvrakey ta lonko ñi kimgaal ñi torogen lefvn mew.

Rvnkvtn

Pu mapuce yem rvnkvkefuy lefvn mew cew ñi mvlemum ta muxug tañi kimgaal ñi rvnkvken may. Tañi rvnkva el xawvkefuygvn pura egu mari, ka ixo kiñe cazkefuygvn ñi kimgaal ñi rvnkvfegen. Pu rvnkvfe yem ayvwkelay ñi rvnkva el re muxug mvten, mv, ñi kimgaal ñi kawcugen ixo rvnkvlu ka pvr xanawkelu tañi pegenoael mvca y awkan mew konfule rume yem! Tvfeyci azkintukelu awkantun

ayvwkeygvn tañi peel mew fvxake rvnkvfe ñi ñiwagen mew tañi xanael, tañi lefkvlen ñi femken.

Weycan awkantun

Jiqkan

Jiqkan ta epu nefkv niefuy ka kiñe zuke rumefuy, fvxa mamvj em ka, ixokom pvle ñapazgefuy ka yugelafuy wecuñ mew. Epu newengeci kawcu epu xekan fente mapu leliwkeygvn tañi newentutuael ta fvxake ñiwa awkantufe em. Vxvftuy ta kiñe kupaf lonko wvlelal, kagelu kaxvtufi zincumekelu mew may. Ka kupaf kvpalu lefkefi ta kupaf kiñe rvnkvn mew mvten ixo cuci pvle mvten. Norvmkey ta kiñe ñi lipag kupafgeal tuaytun mew, ixo kawcugen mew may. Vrkvlu ta kaxvtukelu ta kupaf welu nvkey ta jiqkan tañi wvño kupafael ta kayñe. Femgeci awkantun mew ta mapuce ñiwagey tañi negvmafiel kom tañi kalvl, ka ñi nekv inaniefi tañi vxvfael ta jiqkan kupaf.

Wazatun

Weycan mew mvten nakvmkey pu toro ta wazatun mew ka tvfeyci makana egu je may, ketantuwe femgefuy ta waza ka yugefuy em! Ixo zoy kawcu mvten nvkefuy ta waza tañi pulxv yemeafiel peb pvle fvxake kayñe yem! Kapvr kiñe ñiwa kompañ kupafkefi fvxa makana mew tañi pvr bayael kayñe yem! Wvnegeci mew wazatun zuamkefi ta ce tañi nakvmafiel ta pu winka ka tvfa pvle maloal mew ta malofe.

Makana

Makana pigeci mamvj em nefkv ka ragiñ niefuy, ka kiñe zuke rumefuy, miñce wecun mew fvxa rumefuy, wenu wecun mew nvfalfuy pvcí ñi kvzawnoael rume je may. Tvfaci fvxa mamvj yugefuy meli pvle, cuci pvle ñi naqvn bayafulu mvten ta ce, ka wazatun ñi kejun mew ixo bagvmkefilu mvten ñiwake ce. Awkantun mew ta makana ta zuamkelafi ta ce re jiqka mvten nakvmkefii. Makana ixore weycan mew mvten nvkefilu ta ce, re ñi bagvmwinkayal mvten. Pu weycan ce ixo upelafi ta lefkvlen ka ñi ñiwa kawcugen awkan mew je may, kawcu ka gemken. Makana ñi kupaf ixo bagvmnoael reke ta nakvmkefilu ta kawcu, awkan mew wvlxekelafuy ta kawcuke awkan mapuce yem! Ixo cumgeci weycan gefule rume jvkanoafulu fvxa awkan mapunce yem! Wewkefuy ta ce yem ñi ñiwagen tuayael ta lipag.

Rvgitun

Famgeci awkantun mew ta mapuce ixo ñi tuntepun ñi ñiwagen ka ñi kawcugen tukukefuy tvfaci sakiñ awkantun mew. Kisu ñi kalvl em kvrvf reke amukefuy ka kaxvtukefi ta kupaf cumgeci ñi kvpan mvten. Kvjinolu ta ce rvnkvrnvkvmekey cew ñi wixalen wenunpvakefi fvxa lonko yem, nvlanvlamekefi fvxake ge ka petu ñi nvkermeken kupafnakvmkefi fvxa kayñe yem! Wvlelgelu em jazkvkey may ayekey, notu kvjikey, kupafkey ka rvnkvrkey, wixakefi fvxake kupaf ka wirari may tañi piae ñi nienon ta kon ñi sakiñ awkantun em mew. Mvr kayñe ijkulu may gvrv ñi gvnen reke vxvftukeygvn ta rvgi tañi lonkotuael egvn, femgeci may afkey ta awkantun.

Waykitun

Tvfaci awkatun mew may newentuy ta mapuce winka ñi weycan mew ka faci ce ñi awkan mew. Waykitun mew may ta kimi ta kalvl ñi cuci pvle lefyael tañi tugenoael kayñe ñi wayke je may. Zoy kvme awkantun ta lefkvlen ta rvnkvn ka kvme fvh xipalu ta wayki ñi zuam mew je. Ixo cumgeci pvci mamvj mew rume awkantukelu ta ce, re xawvn mew mvten kimgcekey ñi awkantufegen. Tvfaci weycan awkantun mew ta mapuce ixo rvnkvkvtumekelu, wayki ta negvmfilu kiñe mew ta rvnkvn mew je may.

Kvjitun awkantun

Wixuwetun

Pu mapuce yem kimvrkeygvn kay ñi kvmegerken ta notu kvjin, feymew em tañi ayvkerken ta wixuwetun. Feymew may mvfvke ce bewfv pvle xipakerkeygvn tañi notu vxvfael tañi kimgceal ñi zoy vyew puwlu. Cuci holnofilu ta bewfv konkelafoy ta wixuwetun ci awkantun mew. Cuci wewlu kintukerkeygvn ta kiñe koyam notu kvjiael ixo kiñe mew mvten. Kom ce wixutukey kiñe kura, feymew may kiñe ejkawkey furi koyam mew tañi kimgceal ñi iney ñi kvjin. Zewma kom wixutulu kiñe kura, ka kiñe amuligvn zoy ijkuekey kvjinolu may, femgeci amulkey ta kom kura. Cuci kvjilu wirarkey may, ayentufi kakelu ce, tvfa ta toro nienolu kon, ñiwa ñi fotvm kay. Feymew may kvjikenolu vnatukey tañi kuwv, ijkunkefi pvjv ñi kayñe tañi wewpafiel ka ñi koybatufiel ñi wixuwe may. Fvxa ka mapu amulkefigvn epu pataka egu epu pataka kecu mari. Pu weceke wenxu ta zoy ayvkefigvn tvfaci awkantun, feymew kamañkefilu ta kujiñ miawvlkey ta wixuwe egvn. Miawvlkefi bagvmafiel ta ziwka egu wilki. Pvramuwvn mew inakintukefi ta mansana egu wa lepvmafiel ta cozooy egu kvrew.

Pvlkitun

Tvfaci awkantun tañi mvna ayvfilu ta ce pu mapuce ixofij antv may afelkelafi. Lipag may ñi fvh ka kom fvh negvmkefijelu ta pvlkitun. Pvlkitun ta konkey ta kiñe rvgi ka kiñe mamvj yugelu. Zewma ta mapuce bagvmkefilu ta kiñe vñvm pvlxukvnufi ta kiñe koyam mew tañi notukvjiam. Kom ce notu kvjikey may, feymew kiñeke ñi kimgceal ñi zoy ñiwagen feypikeygvn: tvfa ta lonko mew puwalu. Ka ce kay feypikey: tvfa ta wele mvpvn, tvfa ta furi, ka tvfa ta man hamun, pikeygvn. Femgeci may wirarkey pvlkitufe

Lvkaytun

Lvkaytun ci awkantun may kom kalvl ñi fvh ta negvmkefigvn. Pu lvkay may ta kvla kura xawvlelu egvn kiñe pizkon koron mew. Tañi newen neykvnugeal tuayelgerkey ta wenu lonko mew, femgeci je ta pu lef xipalu em. Lvkaytun mew nvgekelu ta ce awkan kujiñ. Tañi kvme neykvnugeal majmawkey ta kawcu, ixo kvme lepvmkvnukefi wenu lonko mew ñi puwael lonko lofo kujiñ mew. Tañi wixanakvmgeal ta kujiñ maynakvnugekey lefkvlen mew. Kawcu lvkayfe wirarkey

cew ñi tuael ñi lvkay petu ñi vxvngenon may. Ixo fentepun majma kawcukey ta ce lvkaytun mew ñi cumgeci cegen nakvmkefi mvten kvjin mew.

Xawvn awkantun

Mvxatun

Mvxatun ta awkantukefi ta mapuce yem! Nvwigvn may tañi notu xananaqaal. Newen negvmigvn, mvr ta rvnkvrnkvmekeygvn, wirarigvn jazkvlen. Tvfaci awkantun mew ixo cumafelci ñi amun ta kalvl, neyvñ cumafelci ñi xipan. Nienolu ta kon mvxatun mew lipagtun ta nakvmkefigvn, famgeci awkantun zoy newentukey ta ce ñi xananaqaal. Topebtun kvtu nakvmfi ta ce yem!

Lonkotun

Lonkotun mew ta nvwkey ta ca lonko mew tañi newentuam kom ci fvh peb mew mvlelu, famgeci awkantun mew ta newen cegejelu ta ce ka cewvl rumel niefilu ta lonko. Feymew je pu mapuce yem kvpa kewatugeael ina amukelay ixo kvme norvm wixalekey mvten tañi jazkvlen feypiael:

cewvl lonko mew

fvxa xapial reke

petu niekay newen

ñi ayvw kalvl em

Zomo kvtu lonkotukelu, tañi kimgaal ñi fvxa lonko niegen mew xemvmcekelu.

Feymew je pu ce tañi kimgaal ñi ayvvfiel ta lonkotun rumel ta fvxaakey ñi lonko.

Awkantuael ta lonkotun mew, newentu may nvkeygvn tañi laxanaqaal mapu mew,

wewlu may entulu pu cagvj kuwv mew kiñeke lonko ixo kawcu ñiwa lonkotufe

pigekey may. Kaxvn lonko mew kupilvn mew je kimgakey tañi kvme

lonkotufegen. Feymew may tvfa wvla je kulpuael mew ta ce fvxa tuaygekey ñi

kupilvn. Cuci ñapazgelu ñi lonko yewvlkagekey ñi femvm mew, feymew je tañi

tuntegen ta lonko femgeci may kvmegeonon ci ce pigekey. Caw em je petu ñi

pvcikan xvr tuaykefi ñi lonko yem! Lonko may ce kimvm mew rumel cewvl

amukey.

Mamvj newentun

Pu ce yem notu newentukey kay mamvj egu may! Kiñeke rupa ta yemu egu ka

koron egu nakvmkey. Famgeci newentun mew, piam, furi egu wente je

kuxankelay ka rumel newengekey ta ce. Tañi awkantual mvr anvkey mapu mew

tañi meli hamun kisutu xawvlen vrkvkeygvn, fvlmakeygvn ta mamvj egu koron,

newentual ta wewkey wenu wixan pvrafilu ta kayñe. Tvfaci awkantun ixo sakiñgey

may, kisu ñi vy ta mamvj newentual pigekey. Kom newentun ta zuamkefilu ta ce,

cagvj kuwv mew nakvmkelu ta ce, mvxatun zoy ayvfi.

Palitun

Kuyfike ce ñi gvbam je tañi xawvken kiñe lelfvn mew ka ñi tuayken lifkvlen ci

lelfvn mapu mew. Pu lonko yem anvmi cew ñi rorkvlen ñi mapu pvle je may,

aymvñ tuaykey ñi puke koha egu tañi azkintuafiel ta kom pu jitulu ka aftukefilu

ta xawvn. Famgeci xawvn mew ta gvcaltukey ta ce ñi awkantuam, mvcayke twa ce ñi awkantuam, mvcayke re awkantukeygvn, feymew tvfeyci wewnolu jazkvlu egvn gvcalkfigvn ka kimkefigvn ta antv ñi awkantuael ka iney ñi paliwe mew ñi xawal, kom pu lonko niekeygvn ñi paliwe. Kiñeke rupa kuyfigen ñi xawvmuwnon ta ce ñi awkantual kiñe lonko may mvxvmkefi ta werken ñi werkvafiel kañpvle ci lonko mew ñi calimeafiel ka ñi feypimeafiel: kvme wehvy, iñciñ taiñ pu baku ñi gvlam em feypikey may taiñ pu caw awkantun zugu mew wenigekefulu egvn em! Ka ñi pewkefiel may. Iñciw em may kuyfi may ñi pekenofiel ka kuyfi yem kay ñi jaqkvnuken. Feymew may werkvkvnukeyu tami calintual mew ka ayvkvnuafiel ta awkantun, palituayin may taiñ kimam ñi wenxugen ñi wenxugenon cey taiñ pu ce lonkotun mew ka lelvn mew, ñi pu baku ñi ayvn awkantun em! Awkantun xawvn mew zoy wehvygeayin may ka zoy kimkeay iñciñ taiñ puke wehvy koha yem may! Feyley may ñi fvlmajen zoy mvlefuy ta zugu tañi zoy kvme wenigeael ñi wvzamkvlen re bewfv mew mvten, zoy kimkeayin ka xawvlen kiñe xokiñ mew wewkeafiyin kim palinolu je may. Feley may kvme wehvy, epe akuy ta we xipantu, akule em palikantuayin em may, pura konle ta kvveh awkantuayin ta ilo, muska ka winka pulkv. Kagelu lonko yem may pi ka: fanten mew awkantuayin, pikey, kvme zujigekey ta antv may. Zujin antv mew kom egvn xawvkeygvn paliwe mew, liwen may akukeygvn ka kvpaligvn ta wvño, wvño zewmagekey kvla ka gefvñ egu. Liwen akukeygvn tañi kimvlgean ta paliwe tañi kvna elegeael, paliwe ta pataka egu epu pataka xekan niey, fenxen palife akukey, zujigekey zoy kvmelu, welu epu mari ka kvla mari ce konigvn kiñe pvle may. Epu xokiñ norvmkvleygvn ñizol niefigvn ta pu lonko fey ñi zuam nielu ta palitun, pu geh palife fenxetu cazkeygvn tañi yam kom ce. Pu awkantufe ta cazkeygvn kay, caznolu awkantukelay, iney no rume cazkelay kizu ñi ce ñi kayñe ce pigelayafuy may. Pu azkintufe awkantujelay may, welu inkakefi kizu ñi puke ce ka wiralkefi tañi zoy newentuam egvn. Pu awkantufe re xilxagkvnukeygvn re ñi camaj mvten eligvn ka kvme ziwajtukeygvn may tañi xananakvmnoael. Pu geh awkantufe pealu egvn epu toro reke wirarigvn tañi kimam ñi pegen egvn, norvmkeygvn tañi lefklven konael. Epu geh palife ixo nienolu ta kon palin mew, feymew je wirarkeygvn ñi zuguael kvmeke palife ñi pin mvten, yegekenon ta ce femgejen. Feymew may, kiñe awkantufe ñi piwke wecupay ta pali, geh pali feypifi may: eyimi kvme ayvn pali, fij antv may yeniekeyu piwke mew, yafvluwayimi, kvme yenieafimi tami epu entuael ka tami yegenoael tami caw ñi pvjv, newentuayimi tami yerpuafiel kayñe ñi pvjv may pali, ixo lefklven amukeayimi tami kaxvtunogael ta eyimi kvme pali, pieyu may. Pali koni zvguj mew may, ragin paliwe mew mvlelu, ina zvguj mew mvlekey epu ñiwa kawcu palife zvgujfe pigelu em may, Fuñmalelu ta ina zvgujfe pigeygvn. Xipan paliwe mew zoy yewmekelu ka zoy newengeci awkantufe wixapuy tañi kaxvtuael ta pali, fey ta xipa paliwe pigey, ñizol ta entukey ta pali, geh kuzen ta ñizol pigey ka fanten xalan pikey. Kom egvn may zugukelay ka kvme ajkvtukey ñi xawawken ta wvño ka kvla wvllu wla yafvluwkeygvn tañi yeyam kizu ñi pvle ta pali je may, kiñe pvle xipay may inafi pu lef fvta zvgujfe ñi yeyafiel, elmeñi kompañ pvle tvfa kay kupafkvnuñi femgeci amuy may tañi kaxvtugenoael ñi xipayael ñi kiñe entuael may, pu kayñe ka lefkeygvn welu kaxvtukelafigvn. Kiñe wvllu ta pu palife ayvwkey ta ce, kimgkey cuci ñi zoy kawcugen ta palife, fvxa wirarvn ajkvtukey may wewlu ci ce mew ka pu ajkvtufe feypikeygvn: ixo xuxi rupa kvpa wewkey! Kimlafimvn? Kimlafimvn cey kam tvfaci hamum ka tvfaci lonko ñi pagigen?. Namlu may jazkvkeygvn may, akuay ta iñciñ vy ayekantuam kay. Nocikeci ñi cumgenon reke wvñokeygvn ka feypikefigvn geh palin: ixo may yafvluwge, newentuge ajkvtulayimi ayekan, tvfaci ce wewle xalagxalagafin lonko yem! Zewma puwlu may ñi jituael

epu konci pali mew pu lelife wiralkefi tañi pu ce tañi feypiafiel may: wvnelepe pu kayñe, wvnelelu wewkelay, inalelu zikey ta awkantufe, yayayayaa pilu ta ce ajkvтуkey may kvla xalagxalalvn pilu ta wvño zvgujfe mew. Newentuy ta ce pali amuyelay, pu palife enxikeygvn, kiñeke vxvftukeygvn ta wvño, tañi lonkotuael, wirarigvn jakvlen wewge, kakelu yenieygvn ta pali. Kiñe wenu vlxufi ta pali tañi majkotuaefiel ka palife tañi pu lef xipayael may, majkotufe newentu wirarkey: fey ta awkantufe kon nienolu, tvfa ta kawcu mapu toro, tvfa ta kawcu lefgeci hamun, tvfa ta xapial ñi maxa, pu fvtake ce feypikeygvn: femgeci may kimgеkey ta kvmeke awkantufe. Kakelu kay: wewkinolpe, pigvn, pu azkintufe kewakeygvn kewalu pu awkantufe, femkey may ta ce ñi kimgеal ñi cazken egvn kay. Kiñe xokiñ epu yey, xakiñтуkeygvn may pali ka pvle, neykvnuual may ta we pali feypi: eyimi may ajkvтуymi kom ayekan tvfaci ñiwa kayñe weni, wewfige fey ñi pvjv, koreltufiyiñ rume, ixo yekiliñ may, wewfigvn may tvfaci weni, wewken ñiwake palife mvley may zvgu, ñi pigeam kvme palife. Kake gvbam may feypilayayu, eyimi kimimi may cum ñi felen ta vy feley tami vy, wewgelmi wewgean ka, wewgeliñ may nielayayiñ may tañi cegen ta palitun mew may. Ka wvño jitulkeygvn ta awkantun, ñamlu may epu entuygvn, koreltuygvn may akulu puh may afkey ta awkantun may, putukey may ce ka ilotukey tunte ñi xawvlen. Zewma epu entulu ta kiñe xokiñ xafkintukeygvn, cuci kiñe entulu koreltukey, femgeci cuci epu yelu kiñe yey mvten kagelu kiñe no rume yelay, ka entulu kiñe no rume yekeyelay. Koreltulu ka wvño jitulkeygvn may, feymew je tañi abvn ta palitun, cuci epu yelu ka kiñe entulu kvla yey, fey ta antvy pigey may, ka kiñeke rupa kaycilkvnukeygvn pu palife ta palin, femgeci vxvftun ta kvmelay may, ka wvñokey zvgujwe mew, femkey mvten pu palife mvten kvmenolu ta awkantun mew. Cuci wvne meli entulu ta wewkey, kagelu kay kujikey. Ka wvño awkantuayiñ, pikey wewgekelu, welu pvr kuzelay may, rupalu kiñeke kvveh wvla ka mel rume ka femgeci antv mew tañi cazal kay kay ka fente ilo, muska ka winka pulkv, ka kuzelu ce kuzekey ñamlu ci ce ñi paliwe mew, jitulkey ta awkantun tvfeyci inaluv mew tukulu ñi pali ka ñi pali egu may.

Maci ñi konvn

Pu maci ka pu pelon ñi gvbam zoy konkey ta palin zugu mew, feyegvn je ta kiñeke rupa inkakefigvn pu awkantufe tañi awkantuan ñi awkantunoael. Kom pu awkantufe elmekey ñi wvñi tañi zawvngeal tañi wewan ñi wewgenoam cey cew konle feyci wvño. Maci ta pewmakey, pelon ta pelokey pu zawvnfe kay weza femkey, kiñeke ka kom bawenfe niey ñi zuam. Pewmalu ta maci akukey ta pvjv ñi zuguael kalku egu ñi feypipafiel ñi tunten kvzaw nieael tañi wewam. Pu maci epu rumekelay ñi zugu, ixo may feypikey re nor zugu mew feypikey: iñce ñi pvjv ñamaygvn, pi. Pelon kay pelokey, pegpalu pvr feypikey, wewle kimpayaymvn tvfaci kiman. Pu pelon ta zoy feyentugekey ta maci ñi zugu mew, ka zoy falilfi tañi gvbam, feymew je ta pelon re kiñeke rupa mvten pegekey. Pu zawvnfe zoy jvkagekey ta kom pu bawenfe mew, zawvn zugu ta kvmelay, palitun mew, lefvn mew ka ayvn zugu ñiwagey ta pelon, pu zawvnge ta yekey mvfuke wvño re kiñe xokiñ mvten je may tañi bawentuafiel, miñce mexvl elelfi tañi gijatual kom puh ka gvyon ruka mew zumiñ mew tukulelkefi ta bawen tañi kimnoam iney no rume, wvño ta ñiwa ixo re kizuke kaxvtukefi ta pali.

Ko Awkantun

Kotun

Wixalu egvn ta ce, ñawe ka ñuke amukeygvn ta rvganko mew tañi kotuam. Kvme rofvlkefigvn ta lipag, cag puxa ka furi ñi entuam ta puh arofvn, pikelu pu zomo yem. Fij antv may kotukey ta ce, fey ta kotun pigeey may. Kotulu ta ce pepi amukey zuamlu ta mvñetual ta ragi antv ixo tunte antv gele rume. Pu wenxu kotukey kiñe rvlun mew mvten tañi rofvael pvr kom tañi kalvl ñi kvme lifael. Kotun ta zomo mvten ayvkefi inaltu rvganko mew.

Mvñetun

Kuxanlu ta ce may pepi amunolu ta bewfv mew kucakey kom ñi kalvl, fey mvñetun pigeey. Mvñetualu ta ce ñi kure egu amukey rvganko mew. Zomo ta yekey metawe ka tapvb. Xinxankvnukey ta wenxu zoy wvxukolfi, kvme mvñetukefi furi pvle ka piwke pvle ixo kvme tuaykvnukefi. Ka rofvtufi ta tapvb egu may tañi entuafiel ta ka wvxun ko egu je may. Pu mapuce yem kuyifike ce ñi gvbam nieygvn, anvlelu ka wixalelu ta ce wvxulkelafigvn ta ko lonko mew ta ce, potinkvlelu mvten folcogekey ta lonko. Ragi antv ta mvñetukey ta ce. Pu wenxu mvten mvñetukey ka ñi kisulen mew mvten mvñetukey. Kawcu zomo egu femkelay re ñi kure egu mvten. Mvñetualu ta wenxu ñi wvnen kure egu mvten amukey. Mvñetualu ta mapuce: faman, pikelay, azkintumeafuy pvcike ce, feykemejelafuy may.

Weyebtun

Bewfv mew ta mvñetulu ta ce ta weyebtun pigeey. Aregeci antv mew mari, epu mari egu amukeygvn ta bewfv mew tañi notu weyebkantumeal tañi hoan ta bewfv mew. Tañi wvxenoam ta kalvl wixakey bewfv mew ka rvlurvlumekey ta ko mew re kuwv mew mvten je may, re tuayvn mew mvten femkey ta weyebtufe je may. Tañi kimgeam ñi kawcugen ta weyebtun mew afkazikvlen ta weyebkey. Tañi vrkvtual kay petu ñi weyebkvlen paylakvlen weyebmekey ñi ñoci negvmam ta lipag ta hamun egvn. Weyebtun em ta zoy ayvkefi ta pu mapuce.

Rvlun

Cuci kim weyeblu ta feley ñi kimafiel ta rvlun. Ixo feley ñi kimafiel ta rvlun tañi fente zuamgen ta weyebfe ñi nentuafiel ta ce petu erkuel ta bewfv mew may. Tañi rvlual t pu mapuce yem wvne konkey ta zoy pvcilu ta bewfv, kvme lepyvmkey tañi ñamkonal ta lonko pvr entuafilu. Ka kiñeke rupa potinkvlekey, neyvnlav tañi konafiel ta lonko ñi entutuafiel pvcin abvñma mew wvla, fenxentu wvla femkelu ta kimkefi mvcaay mvten ta rvlun. Pu mapuce yem re kimaal mvten ta kimlafi rvlun, mv, kimfi tañi ejkawael tañi pegenoam petu ñi lefkvlen leflu bagvmgenoael. Fvxa winkul mew ta pu mapuce yem vxvfnakkelu ta bewfv mew ñi cumnoal rume, feymew je ta awkan mew serantukelu fvxa winkul mew ixo winkul ka bewfv pikelay tañi hoafiel ta fvxa wvxun bewfv, naqlu ta bewfv mew rvlukey ñi wecupuael ta mari xekan ñi zoy vye pvle, negvmkefi ta lonko ñi kimgenoam ñi jvkanunom. Feymew je ta mapuce yem petu pvcilu rvlukey tañi yeyam ñi caw ñi gvbam tañi montuken ta ce re rvlun mew mvten kiñeke rupa.